

國粹叢書第二集

下冊

張蒼水全集

國學保存會印行

532079
-80

張蒼水全集附錄三

傳略

欽定明史

東閣大學士兼兵部尙書張煌言鄞縣人初以舉人奉表迎魯王至紹興監國復以兵從至海外後桂王遙命爲大學士聞滇南平散遣部曲遁居懸壘爲大兵所襲執諭降不從死

仁和縣志

張煌言字元箸別號蒼水明州之鄞縣人崇禎時舉於鄉國亡嘗舉兵海上總督趙公廷臣遣札招諭不降康熙三年竄身懸壘懸壘海中小島在普陀之東極荒僻無民居煌言與客羅子木僕楊冠玉等五人結廬其上蓄二猿以候海舶每見有舟近則猿登樹顛哀呼號鳴煌言等輒避去趙公偵知之先伏兵於普陀一日煌言遣小舟買米遊擊某即登舟叱縛二人不肯言隨殺之舟子懼告其處引兵夜至懸壘煌言坐處置一劍有警卽欲自裁是夜聞蘆葦颯颯有聲急呼從者起時我兵已入室不及避遂就縛

趙公尙勸其降煌言曰惟速死爲幸九月初七日斬於市臨刑顏色不變且賦詩杭人哀之

光緒鄞縣志

張煌言字元箸號蒼水圭章之子母趙感異夢生煌言

案全祖望撰張忠烈年譜母禱漢壽亭侯祠得異夢

生公故小字阿雲

神骨清挺豪邁不羈能文章善騎射思宗以下多故令諸生於試經義後

試射煌言三發三中崇禎十五年舉於鄉常感憤國事願請纓及錢肅樂起師煌言先至即遣之天台迎魯王授行人王監國紹興賜進士加翰林院編修入典制誥出籌軍旅閩中頒詔之役自請爲使釋二國嫌既歸晉侍講兼兵科左給事中累有建白丙戌師潰汎海將之舟山道逢富平將軍張名振扈王入閩從之行招討鄭成功不奉命乃勸名振還石浦與威鹵侯黃斌卿爲犄角加右僉都御史明年松江提督吳兆勝請以所部來歸斌卿不樂從煌言說名振應之魯王給印二百道命煌言監其軍至崇明颶風覆舟煌言脫身走間道歸海上已丑復集義旅駐上虞之平岡諸山寨咸事鈔掠煌言獨履畝勸稅相安無擾庚寅王居舟山名振當國召煌言入衛加兵部右侍郎辛卯

秋舟山破扈王再入閩次鷺門時成功縱橫海上奉隆武年號於魯王則修寓公之敬而已惟煌言以名振軍爲衛成功因之加禮煌言極推其忠嘗曰招討始終爲唐眞純臣也成功亦曰侍郎始終爲魯與吾豈異趨哉癸巳冬返浙招軍於天台明年復會名振之師入長江登金山遙祭孝陵三軍慟哭失聲烽火達江甯以上游師失期左次崇明四年再入長江掠瓜洲儀眞抵燕子磯而所期終不至遂乘流東下聯營浙海是年名振卒遺言盡以部下歸煌言於是軍容始盛丁酉王去監國號通表滇中戊戌桂王在雲南遣使間道赴海封鄭成功延平郡王命煌言爲東閣大學士兼兵部尙書

案桂
藩紀

年以爲官兵部侍郎兼翰林院學士
釋史從之非也別有案語詳大事紀

七月監成功軍北行抵羊山擘龍爲虐海舶

碎者百餘義陽王溺焉乃回舟山修葺已亥成功全師犯江甯煌言以所部數千人並發謂成功曰公不如先取崇明崇沙江海門戶懸洲可守脫有疏虞進退有據不聽以煌言爲前軍同提督羅蘊章充長江鄉導使官兵已於金焦間以鐵鎖橫江所謂滾江龍者譚家洲岸皆西洋大礮煌言出入其間令善泅者截斷滾江龍將奪上流木城而舟多爲礮所擊不得前乃登舵樓焚香祝天以十七舟翦江渡木城俱潰直抵瓜州明

日成功至官兵出禦死者千餘乘勝克其城先是議師所向成功欲先江寧煌言欲先鎮江成功曰吾頓兵鎮江金陵援騎朝發夕至爲之奈何煌言曰吾以偏師由水道薄觀音門金陵將自守不暇豈能分援他郡成功然之即請煌言往未至儀真五十里吏民迎降六月二十八日抵觀音門成功已下鎮江水師畢至七月朔哨卒七人掠江浦取之五日煌言所遣別將以蕪湖降書至成功虞江楚援師且至也請煌言控扼蕪湖以制上游乃至蕪湖相度形勢一軍出溧陽以窺廣德一軍鎮池州以截上流一軍拔和陽以固采石一軍入寧國以逼徽州傳檄郡邑江之南北相率來附郡則太平寧國池州徽州縣則當塗蕪湖繁昌宣城寧國南陵太平旌德貴池銅陵東流建德石埭青陽涇縣巢縣含山舒城廬江高淳溧水溧陽建平州則廣德無爲和陽凡得四府三州二十四縣煌言令甚嚴諸軍肅然秋毫無犯所至城邑考察黜陟長吏如州牧行部事江楚魯衛人士多詣軍門受約束歸許起兵相應亡何而江寧之敗聞煌言方受徽州降乃返蕪湖初煌言語成功曰師老易生他變宜遣諸帥分徇郡邑金陵出援我則首尾邀擊如其自守我則堅壁以待倘四向克復收兵鱗集金陵如在掌中矣成功

不聽自以爲江寧旦夕且下士卒釋戈而嬉縱飲奏樂官兵諜知之以精騎襲破前屯成功倉卒移帳質明軍竄未就官兵傾城出戰衆無鬪志成功亦遂乘流出海并撤鎮江之師而去於昃橫江之艘皆屬官兵煌言歸路已梗乃引舟趨鄱陽八月七日與楚師遇而吳潰焚舟登陸軍士尙數百人歷霍山英山登東溪嶺追師奄至士皆竄止一僮一卒迷失道路賂土人爲導變服夜行天明而蹤跡者衆導者亦去茫然不知所嚮念有故人賣藥於安慶之高河埠求一人導至其所至則故人他往而故人之友識爲煌言憐其忠義教之由樅陽湖出江渡黃湓抵東流之張家灘潛走建德祁門兩山中煌言方病瘡力疾趨休寧買棹入嚴州恐浙人熟其面改而山行自東陽義烏出天台以達海壩樹蠹鳴角散亡復集成功聞之遣兵來助煌言巡視海上有長亭鄉者多田而苦潮乃募義民築塘捍之至今猶蒙其利尋遣使告敗於滇且引咎桂王專敕慰問

案此事誤姑依碑書之語詳大事紀

庚子移師林門旋軍於桃渚辛丑入閩次沙關成功將謀臺灣已

抵澎湖煌言遣幕客羅子木以書挽成功謂軍有寸進無尺退今一入臺則將來兩島恐不可守是孤天下之望也不聽時成功雖東下而官兵尙懼其招煽沿海之民遂有

遷界之役民多不願以威脅之猶遲延不發煌言頓足歎曰棄此十萬生靈而爭紅夷乎已而滇中事急成功方得臺不得行煌言乃遣職方郎中吳鉏挾帛書入鄖陽山中說十三家使之撓楚救滇而十三家已衰敝不敢出壬寅滇中陷成功亦卒煌言大哭還軍林門適閩南諸遣臣復謀奉魯王監國貽書來商煌言喜甚卽以書約故尙書盧若騰等勸以大舉并約成功子經勉以亞子錦囊三矢之業復厲兵束裝以待是年浙督與中朝所遣安撫使各以書招煌言煌言復安撫書略曰不佞所以百折不回者上則欲匡扶宗社下則欲保捍桑梓乃因國事之靡甯而致民生之愈惑十餘年來海上芻蕘糗糒之供樓櫓舟航之費敲骨吸髓可爲惕然況復重之以遷徙訖以流離哀我人斯亦已勞止今執事旣以保兵息民爲言莫若盡復濱海之民卽以濱海之賦界我在新朝旣捐棄地以收人心在不佞亦暫息爭端以俟天命當與執事從容羊陸之交別求生聚教訓之區於十洲三島間而沿海藉我外兵以禦他盜是珠厓雖棄休息宜然朝鮮自存艱貞如故特恐執事之疑且畏耳則請與幕府約但使殘黎朝還故土不佞卽當夕挂高帆不重因此一方也又復督府書曰執事新朝佐命僕明室孤

臣區區之忱言盡於此是冬十一月魯王薨於臺國案年譜甲辰公在舟山監煌言哭

曰孤臣之棲棲有待徒苦部下相依不去者以吾主上也今更何所待乎癸卯遣使祭

王會故將阮春雷據閩之東蚶長腰各島窺福寧煌言率五十餘船往與之合適總鎮

林國梁謀降大清機洩煌言圍之國梁以礮碎其船斬煌言之弟嘉言案煌言有憶從弟嘉

言詩在甲辰散軍以後玩其詩意似未審存亡者蓋嘉言必被擒而死當時海島隔絕故不知殉節確耗也復乞援於福寧總兵吳

萬福萬福遣游擊李應先劉成海等毀東蚶長腰寨甲辰三月煌言與春雷復集百餘

艘泊三都三山等島萬福約水師總兵夾擊追至大洋陣斬及溺死者甚衆春雷赴泉

州煌言回浙六月乃散軍居南田之懸巖懸巖在海中荒瘠無人煙山南有汊港可通

舟楫煌言結茅以居從者祇羅子木門生王居敬侍者楊冠玉案鈕玉樵觚牋作羅自牧楊寶玉均誤

將卒數人舟子一人是時閩粵俱靖惟煌言獨存議者謂煌言不死海寇且復逞也

朝旨急購之係累其妻子族屬以待總督趙廷臣乃遣騎將徐元等詐爲僧人服案釋史南

天痕煌言小校降欲致煌言爲功走普陀僞爲行脚僧則小校當卽徐元也率健丁潛伏普陀山朱家尖蘆花巖三路

伺之值煌言羅舟至急擊之獲其將使言煌言竄處出刀脅之其將赴水死又殺數人

最後者乃告之曰張公不可得也公蓄雙猿覘動靜敵舟在十里外猿輒鳴樹杪得爲
 備矣乃即駕所獲船以夜半至懸巖出山之背攀藤上煌言坐處置一劍有警即欲自
 刎是夜聞蘆葦颯颯有聲急呼從者起而官兵已入室不及避遂就縛并執子木冠玉
 舟子三人七月十七日也比至杭州廷臣勸之降煌言正色惟求速死廷臣知其意不
 回命寄獄中供帳甚盛許其舊時部曲得來慰問官吏願見者弗禁杭人爭賂守者求
 入見或求書煌言亦應之九月七日起市遙望鳳凰山一帶曰好山色賦絕命詞挺立
 受刑年四十五子木冠玉舟子並從死案南天痕作子木冠玉并二水手從死子木名綸以字行溧陽
 人冠玉鄞縣人之冠玉曰司馬公死於忠某義不忍獨生延頸就刃子萬祺先
 三日死鎮江煌言精於六壬兵屯東溪嶺時占得四課空陷方大驚而追騎已及羅舟
 未返占課大凶徘徊假寐夢金甲神來招與壬居敬案原作王采薇當係居敬之字今據神道碑改正言之
 言未既而罹難案神道碑公被執居敬以計得脫後爲僧煌言既死故御史紀五昌杭人張文嘉沈璜書
 等殮之而鄆人萬斯大與朱錫九錫蘭錫旂錫昌兄弟復葬之南屏之陰案清波小志煌言遺骸及楊羅二骨俱爲煌言同郡釋問石暨武林好義之士所葬據是朱氏兄弟當係杭人國朝乾隆四十一年 賜諡

忠烈

兵部左侍郎張公傳

明之亡也死義者連鑣接袵若播遷窮海而之死靡他稱一代碩果者則有宋文丞相而後推明之張司馬煌言云煌言字玄箸號蒼水鄞縣人遠祖當元時逃入高麗以家世仕宋故至明初始歸籍甬東稱高麗張氏高祖伯祥起家孝廉爲令列郡志孝友傳父圭璋號兩如甲子乙榜母趙孺人艱於嗣虔禱關壯繆生時父夢五色雲現故小字靈幼善病病輒瀕死六歲就塾書上口即成誦十二喪母父判河東巖署解州篆爲壯繆故里煌言謁祠下撰文祭告以忠義自矢年十六補邑弟子員迅筆皆驚人語性豪宕喜聲歌六博兼致談兵挾策之徒父庭訓甚嚴屢杖之勿改年二十三中壬午鄉榜即操選政弁其集曰銘燕名大噪乙酉甯紹兵起躡屣走台郡迎魯藩

諱以海孝王第八子癸未

竟州破孝王與世子咸殉南渡襲封僑居台州

授檢討司誥敕時豪帥擁兵自衛目無共主士驕民困雖

有建白勢不得行煌言感憤時事恒聲淚俱咽丙戌六月朔錢塘師潰倉卒馳歸拜其父曰兒將隨主航海竟去監國駐舟山爲行在雖有城郭人民而彈丸地孤峙海中諸

豪帥若王之仁方國安輩或死或降餘皆市儉榮備惟老將張名振一軍獨全且擁戴無二心煌言依名振與之協力希爲一成一旅計張歿代統其兵晉少司馬王兵道爾祿以書招之不應俾親屬開諭百端又不應令其父諭之降終不應最後報曰兒不孝甯爲趙苞不爲徐庶大人善自爲計聞者痛之舟山破監國往依閩帥鄭成功其父芝龍故海中劇盜崇禎初受招安倚海爲窟歲以番舶通日本琉球暹邏諸國積金錢無算陽奉唐藩子冒賜姓跋扈甚性實恇怯無大略丙戌仙霞關不守芝龍投欵條而北去弟鄭彩子成功踞廈門海島以嫌殺閣部熊汝霖他若名縉紳之從亡者如錢肅樂沈宸荃皆愾怏死煌言決其無成不往獨以孤軍留浙海忠信所孚鄭亦敬而愛之不敢犯也既聞父亡一慟而絕比甦不再哭念已破家殉國父死不葬又妻子顛連無以存活故終其身不畜一姬侍蓋刻厲如此吏議拒命久籍其家家屬發京口養贍翼其來歸而卒不動初煌言入海時遇颶風舟盡覆登海島飢困待斃夢神告曰餉君俟千年鹿候十九年還我詰朝果得一黑鹿炙食之人嘗一嚮歷旬不飢遇他舟至獲免已亥鄭成功下鎮江犯金陵煌言亦率其部下樓船揚帆直抵安慶未幾成功兵敗宵遁

煌言聞報勢不能獨留而江路已截舍舟從陸入霍山縣境止一童子相隨紆迴山谷間迷失道乃賂土人爲導日暮飯脫粟棄足上靴易雙履乘月而行至黎明走七十里屢不容足中宵涉水益加窄足趾血殷踵盡裂腹且餒望門謀朝餐凡有問者皆以館師避難對村中聚觀如堵導者尙隔水遠見村民之遮道而問也必謂事露遽逸去既失道復失導主僕兩人步履徬徨鄉音又異皆疑爲逃卒盤詰紛然仍以館師對久方解視其中貌厚者胡姓復賂以金使導行強而後可是日又行三十里宿旅店亦胡族屬也忽胡之弟至招兄出耳語良久却入而曰君從海上來非館師也問何以知之曰頃有十數人過弟舍予弟固問之知君爲海上人吾兄弟意本無他不須過慮也胡之老人聞之亦具雞黍焉凌晨謀所向僉云應從安慶問渡當煌言之離蕪關而趨江上也有舊時賓從朱某來謁叩其近狀云賣藥於安慶之高河埠市中因囑胡導往其地令童子先問朱某藥室所在市人見童子之問朱也覺有異羣踪跡之市豪徐某金某皆歛產夙與朱善偶從橋上過聞童子問朱君市人又蹤跡童子亦覺有異以數語解散市人竟去而朱適他往未返無居停止投宿逆旅媼亦歛人聞爲朱君來乃下榻而

胡姓導者將於次早別去勢不可留益悵悵無聊條記安慶向有賣稻船往來江南北必取道樅陽湖高河之樅陽一水可通令胡竟便帆渡江出池州將登九華山徐圖歸計買舟既定暫止客店金與徐又自外至引入空室問曰君得毋姓張乎詭曰吳姓金曰不然君固司馬公也日者與朱某同謁公江上而軍務旁午余無從晉謁竊於舟次窺見丰采耳遂不諱而告以故金固要至其家始通姓名詰朝令一何姓者爲伴由樅陽渡黃湓出江抵張家灘池州東流縣所轄也再歷建德祁門山中走休寧皆何姓所熟識遂伴同行惟鳥道羊腸較霍山尤甚又患瘧扶病走頭岑岑汗下如雨蹣跚而前東建延袤高山多小寇出沒或乘夜剽掠土人相率持兵守嶺頭凡過客皆攫金爲費有戒心焉將次祁門江右有吳出屯朱橋村舍逋逃商旅裹足賴同行多款人得無他計程兩日抵休寧即可買棹溪行信宿達嚴陵矣乃休邑有客兵過闔閭晝閉乘間得抵城中寓徐之諸父善岐黃者家治具相款然實認爲館師與其猶子善而不識其根柢也兵過買棹將趨嚴陵過新安亭亭長呵止之索篙師金始放行達街口有巡司麻邏卒登舟讎察睥睨久之而去解維過淳安乃入浙省會有文符捉民艇載兵紆道走

遂安凡兩買棹纔達嚴郡而晦迹益難乃自婺之東義出天台以赴海壖鳥道羊腸視徽州爲更甚而辛苦艱難亦復倍之邈自霍山奔走以來之安慶之池之徽之嚴之婺之浦江之義烏之天台寧海計程二千餘里間關百折志不少挫歸而招集散亡寄身孤嶼在南田臨壺間飄泊數年恒以一劍自隨誓死不貳甲辰秋邏者獲二卒爲導突往執之被執登舟所畜一小猴相向哀鳴躍入水死至郡城提督張待以客禮角巾葛衣輿而入張曰張先生何以屢邀而不至答曰父死不葬不孝國難無匡不忠不孝不忠羞見江東勦之降不答次日送之赴省前此投誠諸將卒送者幾千人齊聲號慟煌言神色自若出西門曰姑緩望北四拜辭闕也望郭門四拜辭鄉也隨輿岸上送者拱手而別登舟左右翼而行慮其赴水笑曰無庸此非我死地至武林處於舊府時總督趙勸之降甚力始終不答自被執卽不食日賦詩自娛守者叩頭哀懇煌言徐曰旣辦一死何苦累若等乃復食亦惟啖時果數枚而已一日督院赴館盛額曰老先生部文到矣煌言卽起肩輿至官巷口口占曰我年四十五今朝九月七含笑從文山一死萬事畢端坐於地而正命焉會城義士朱亶生張文嘉等葬其遺骸於西南屏山

今杭人稱爲南

屏先生

淨慈寺左邵皇親墳翁仲後之左側遙與岳武穆于忠肅兩墓相望煌言詩四子湖頭有我師從初志也夫人董先死子萬祺前三日亦被刑於京口幕客句容羅綸鄢人楊冠玉與煌言同死俱葬于左右三塚巍然楊冠玉者大家後裔與煌言比隣父母死從之海上臨刑當事見其幼欲釋之冠玉曰司馬公死於忠某義不忍獨生延頸就刃今寒食酒漿春風紙蝶歲時澆奠不絕而部曲過其墓者猶聞野哭云自丙戌至甲辰蓋十九年矣煌言死而明亡

林時對曰公幕客王畏齋黃巖諸生今披緇名超遜語余云公被執前一日夢金甲神持符稱奉上帝命召公次早向畏齋咤其異俄有白氣一縷直衝至所居茆廠畏齋親見之夜半子時即蒙難嗚呼公之生死固非偶然也

盧宜曰蘇子卿之使漠北也十九年公之處海上也亦十九年而公所歷有倍難者其一生一死固可勿論也公少白皙美丰姿後乃高顴長髯嶽嶽千仞宜家去公宅僅三四十武幼時猶及親公色笑知之最詳亦最確當執公時得一篋滿中皆書札提督張慮連染滋禍取火焚之適里中朱氏婦在署中爲女紅師乞得公詩文名奇

零草兩帙今與北征記祭張侯服

名振字

文答王招撫王兵道趙督院書並傳於此然

則天地之正氣固鬼神所呵護也公誠文山之後一人而已嘗敘文文山小字雲孫而公降生之兆適與文山同是又一奇也

張公蒼水傳

沈冰壺

張公煌言字玄箸號蒼水浙之鄞縣人宋相知白之裔也父圭章天啟甲子舉人官至刑部郎公生而頤岸秀眉削面吐音如洪鐘目瞳炯炯有光顧盼非常輕財結客喜陳法務瑰璋大節不修湯幅細行漁酒色時時從博徒游擲立盡輒大噓稱快爲笑樂數私斥賣其牛產刑部公恨之不能禁也然風骨棱棱不可一世識者早以國士許之年十六補邑諸生莊烈帝以天下亂欲諸生習武備著令試文後較射一時諸生非素習多倉卒應故事觀者皆匿笑不止公引滿三發皆中一時驚服膺壬午鄉薦申酉兩都之變舊臣奉魯王監國於紹興郡人錢忠介公肅樂舉兵應之公與同事授翰林院編修丙戌浙東師潰魯王航海公依肅虜伯黃斌卿於翁洲次年我松江提督吳勝兆陰與吳中士紳定謀復歸明魯王命定西侯張公名振往援公以侍講兵科給事中拜右

僉都御史持節監其軍至崇明遇颶覆舟幾被獲匿於房師故諸暨令錢公世貴所得
免間道歸海上戊子移軍上虞之平岡山與四明山王少司馬翊相犄角焚上虞破新
昌浙東列城爲之晝閉庚寅魯王入居翁洲公朝見次年翁洲破扈王至閩海時延平
王鄭成功遙奉永明王朔王居金門爲寓公而已癸巳冬返浙復監定西侯軍北擢入
長江登金山遙祭孝陵三軍皆慟哭失聲定西侯題詩山寺公屬和一時軍聲大振以
上游師未至左次崇明甲午復入長江掠瓜儀抵燕子磯金陵震動終以孤軍無應迄
無成功乃乘流東下聯營浙海戊戌永明王自滇中遣使授公爲兵部左侍郎兼翰林
院學士我總督郎廷佐寓書招降公答書曰夫瑞臺利鈍指畫興衰庸人聽之或爲色
變而忠貞之士則不然其所爭者天經地義所圖者國恤家讎所期者豪傑事功聖賢
學問以故氈雪自甘膽薪彌厲而卒以成功古今來不可勝計如僕者將略原非所長
祇以讀書知大義痛忿口氣左袒一呼甲盾山立區區之心以濟則賴君之靈不濟則
全臣之節豈繁詞曲說足以動其心哉乃執事儼然以書通似僕亦庸庸者流可以利
鈍興衰動者譬之虎俵戒途鴈奴伺夜旣受其役竟忘其哀在執事固無足怪而僕聞